

O autor do Ribeira Sacra dos 98 puntos Parker fincase na zona

Raúl Pérez alugou unha adega da zona do Bibei asociado co tamén enólogo Luis Buitrón. Os viños sairán ao mercado este mes e terán distribuidor en EEUU.

Redacción | 21/05/2009

Valoración

(0 votos)

Os 98 puntos que concedeu The Wine Advocate ao tinto en barrica elaborado en Ribeira Sacra O Pecado sacudiron por completo a imaxe exterior dos viños galegos, asociada ata entón exclusivamente aos brancos entre distribuidores e crítica especializada. O recente interese de importadores de diversos países por esta denominación de orixe ten moito que ver coa nota da publicación do influente crítico estadounidense Robert Parker a este cobizado viño. O seu autor, o enólogo Raúl Pérez, asesor das adegas Algueira e Guimaro -nesta última elaborouse O Pecado- decidiu agora probar sorte en terras do Bibei con Luis Buitrón como socio.

Ambos alugaron a adega da subzona Quiroga-Bibei Chao do Couso, situada no municipio ourensán de Trives e propiedade de Pío Domínguez, na que Luis Buitrón exerce como enólogo desde a súa posta en marcha. «Non nos lancamos a unha aventura cos ollos pechados, sen ter unha base previa. Buscamos marcas consolidadas nunha zona privilexiada para poder elaborar viños de primeira fila», detalla Luis Buitrón, colaborador e amigo persoal de Raúl Pérez.

A súa idea é manter as mesmas marcas comerciais da adega (Chao do Couso e Alcouce) para o mercado español e crear outra diferente con vistas á exportación. Raúl Pérez, que estes días se atopa de viaxe en Estados Unidos, pechou os contactos para ampliar coa nova etiqueta de Ribeira Sacra o catálogo de viños que apadrilla nese país.

A adega que alugaron ten ao redor de oito hectáreas de viñedo propio e produce da orde de 15.000 litros. A maioría destinase a un tinto sen crianza, aínda que tamén se elaboran uns 4.000 litros de mencia en barrica Alcouce e 2.000 dun branco das variedades godello e dou branca. Os viños da última colleita e o crianza do 2007 sairán á venda a finais de mes. «Na última edición de Fenavin fixemos moitos contactos. Os viños gustan, seguen unha liña diferente que encaixa no qué buscan moitos distribuidores», explica Buitrón.

Formado na adega familiar de Castro Ventosa, onde creou a prestixiosa marca Valtuita, Raúl Pérez é actualmente un dos enólogos de moda en España e un referente das novas tendencias vitícolas neste país a nivel internacional. En Galicia asesora das adegas Algueira, Guimaro, Forcas do Sainés e Quinta da Muradella, e elabora un albariño pola súa conta, sen denominación de orixe, destinado ao mercado internacional. Tamén levan o seu selo os bierzos de Ulloia, é o enólogo de Tilenus, nesta mesma comarca, e está embarcado noutras proxectos en León, Cangas de Narcea ou San Martín de Valdeiglesias.